

To'on yó'o kían mií noó nì taa San Pedro nì sa'an noó na kúú kuendá Jesús

Ká'an Pedro ndisá'an

¹ Yu'u kúú Pedro, ta kúúí iin apóstol, na né'e to'on Jesucristo. Ta ká'an yu'u ndisá'an xí'ín ndo'ó, na nì xitá noo kua'an ndéi chí kuendá Ponto, xí'ín Galacia, xí'ín Capadocia, xí'ín Asia, xí'ín Bitinia.

² Ndo'ó kúú na nì kaxi mií tatá Ndios táto'on kì'o nì chikaa ini na kee na xí'ín ndó nda míí sa'a, dá ná kakuu ndó ñayuu na kee Espíritu ñí ná, dá kueídó'o ndó na, ta ná nduvii ndo kee nì Jesucristo.

Ta ná koo kua'á ña manì Ndios xí'ín ndó, ta ná kì'o na ña koo va'a ini ndo.

Kómí ndisa yó iin tandeé ini

³ Na ká'ano kúú Ndios, na kúú tatá sato'o yo Jesucristo, dá chí sa'á ña nì ku'u ká'ano ini na sa'a yo, sa'á ñoó nì nakaki sa'a yo nì kee na, dá nì kuu nì natiin yó iin tandeé ini ká'ano nda'o noo ná, chí miían ndaa kuiti nì nataki sato'o yo Jesucristo tein na nì xí'í.

⁴ Sa'á ñoó natiin ta'ani ndó iin ña ká'ano nda'o chí induú di'a, chí sa'á ió nduu vaan natiin ndo'ó. Ta kían ña nì iin kuuy ta'ón o tée'i, ta kían ña nì iin kuuy ta'ón o túú, ta kían ña nì iin kuuy ta'ón o ndí'i.

⁵ Ta táxi va'a Ndios ndo'ó xí'ín ndée míí ná sa'á ña kándée ká'ano ini ndo ná, dá kasandaá ndo nì'í ndo ña káki ndó, dá kandeí ndó xí'ín ná, chí sa'á ió

nduu va ña'a yó'o natiin ndó tá ná kasandaá kuu noo ndí'i.

⁶ Sa'á ñoó kadii iní ndo, va'ará tein cháá kuu kánian ndo'o níno ndo kée kua'á noo tandó'ó.

⁷ Chì tandó'ó ñoó kían korndodó ña kándéé iní ndo Jesús, nde'á á ndíta ndaa ndo xí'án. Ta ndaya'i cháá ka ña kían kándéé iní ndo ná o duú oro, tá'an ña xító ndodó ñayuu xí'ín ñó'o, dá nde'á á miían ndaa kuiti oro ndino'o kían o koó. Tído kasandaá iin kuu, ta naá vá oro ñoó. Tído ndo'ó, tá miían ndaa kuiti ndíta ndaa ndo xí'ín ña kándéé iní ndo ná tein tandó'ó, dá kían chindaya'i ñaá Ndios, ta kị'o na ñaño'ó, xí'ín ña ndato noo ndo tá ná na'a noo tuku Jesucristo.

⁸ Kóni ndo ná, va'ará ko ní xiní ndo ná xí'ín noo ndo. Ta va'ará ko ndé'é ndó na viti, tído kándísa ndó na. Ta ndato nda'o kadii iní ndo, ta ni ko ní'i ndo to'on ka'an ndo sa'a ndi kị'o kadii iní ndo,

⁹ chì ní'i ndo ña va'a sa'á ña kándéé iní ndo ná, ta ñoó kían kàki ndó noo kuachi ndo.

¹⁰ Nì ka'an profeta nì sa ndei sa na'á sa'á ña manì ko'on Ndios kee na xí'ín ndó. Nì dakuá'a va'a ra sa'án, ta nì kee ra tata kandaá ini ra ndi koo kee Ndios dákaki na ñayuu.

¹¹ Chì nì dakuá'a ra sa'a ndá yoo kakuu na kee dión, ta ndá oon koo na, chì ío Espíritu Cristo ini ra, ta nì kasto'on na xí'ín rá sa'án. Chì nì xị'o na ña nì kandaá ini ra ña ndo'o nda'o níno Cristo, na kii dákaki ñaá, ndi'i daá, dá nani'i ná ñaño'ó noo Ndios.

¹² Kúu nì xị'o Ndios ña kían nì kandaá ini ra ña o duú mií rá keva'a xí'ín ña dána'a ra, sava'a yóo vá kúu na keva'a xí'án. Ta mií to'on nì daná'a ra tá sata, mií to'on yó'o iì vá kían dána'a na noo ndo viti

sa'á to'on va'a ña ká'an sa'a Jesús, ta dána'a na ña xí'ín ndée Espíritu ij Ndios, na ni kii nda induú. Ta nda mií ángel ndéi induú katóo kandaá ini sa'á ña yó'o.

Kóni Ndios ña koo vii yo noo ná

¹³ Sa'á ñoó kenduu ndo ñaxintóni ndo kee ndó ña kóni Ndios, ta kaño'o ini ndo, ta ndino'o ini ndo koo tandeé ini ndo ña natiin ndó ña maní noo Ndios tá ná nandió koo tuku Jesucristo kasaá na.

¹⁴ Ta koo ini ndo kee ndó táto'on k'i'o kée iin de'e seídó'o tatá, ta o sa kée ka ndo ña kini, ña sa katóo ndo kee ndó tá ko ñá'a kana'á ndó Ndios.

¹⁵ Chì táto'on na vii kúú mií Ndios, na ni kana ndo'ó xoo mií ná, k'i'o dión koo vii ndo noó ndidaá ña kée ndó.

¹⁶ Dá chì di'a kaá tuti ij Ndios: “Koo vii ndo, chì na vii kúú yu'u.”

¹⁷ Tá ká'an ndo tatá xí'ín Ndios, na káyíko ndaa sa'á ña kée iin rá iin yó, dá kí'an koo ñaño'ó ndó noo ná, ta kayu'ú ni'ini ndó na xí'an nani ndéi ndó ñoo tukú xaan.

¹⁸ Ta ná'á vá mií ndó ndí kían ni sa kuu ya'i, ña ni dakáki ndo'ó tixi ndá'a ña ko chón sa kee na yatá ve'e ndó. Chì ko ní sá kian iin ña'a túú, táto'on ndó'o oro xí'ín plata.

¹⁹ Di'a ni ndato mií Cristo, tá'an kirá ni xita sa'á kuachi ndo, ni sa kuu ya'i ni dakáki ñaá. Chì ni sa kuu na táto'on k'i'o iin léko, kirí dóko ñayuu noo Ndios, kirí káa vii, kirí ko yáko.

²⁰ Chì nda rá ko ñá'a kasá'á ñayuú yó'o, nda daá vá ni chikaa ini Ndios ña koo dión. Ta ña yó'o ni kuu tein tiempo viti, chì kú'u nda'o ini na sa'a yo.

21 Ta sa'á ña n̄i kee Jesús dión, sa'á ñoó n̄i kasandaá ndo kándísa ndó Ndios, na n̄i danáta^{ki} ñaá tein na n̄i xi'i. Ta n̄i xi'o Ndios ñañó'ó noo ná. Dión n̄i kee na, dá kían ná kandeé iní ndo Ndios, ta ná koo tandeé iní ndo noo iin tó'ón din̄i míi vá ná.

22 Ch̄i n̄i nduvii níó ndo sa'á ña seídó'o ndó ña ndaa sa'a Ndios n̄i kee Espíritu īi Ndios, dá kandeé ndó ku'u ini ndo sa'a sátá'an ndó xí'ín ndino'o ini ndo. Sa'á ñoó ndino'o ini ndo ku'u ini ndo sa'a sátá'an ndó xí'ín iin níó vii.

23 Dá ch̄i ndo'ó kúú na n̄i nakaki saá, ta ko ní káki ndó táto'on káki ñayuu, na ndéi tóo, dá xí'i na. Dá ch̄i ndo'ó kúú na n̄i nakaki saá, dá kandeí chíchí ndó kee to'on míi Ndios, ch̄i to'on takí kíán, ta daá kuití vá kooan.

24 Dá ch̄i di'a kaá tuti īi Ndios:
Ndidaá kúú ñayuu ndó'o táto'on k̄i'o ndó'o yuku
káa yuku,
ta ña kúryíi ná kúú táto'on ita yuku ñoó.
Ch̄i ích̄i va yuku ñoó, ta kúú kuéi va itaan.

25 Tído to'on sato'o yo Ndios, daá koo kuií vaan.
Ta to'on yó'o kúú to'on va'a sa'a Jesús, ña kían n̄i daná'a ndu noo ndo.

2

1 Sa'á ñoó dánkoo ndi'i ndó ña kini xí'ín ña maña kée ndó, ta ko kánian kakuu ndó ñayuu uu noo, ta ni ko kánian koo u'u ini ndo, ta kánian dánkoo ta'ani ndó ndidaá ña kini ká'an ndo sa'á ñayuu.

2 Táto'on kée takuálí nándukú xí noo chíchí xí, k̄i'o dión nandukú ndó to'on Ndios, ña kúú ña ndaa, dá kua'ano ndó xí'án nani kasandaá kuu k̄aki ndó.

³ Ta k̄i'o dión kee ndó sa'á ña xí'o ndaa ndo kuendá ña va'a nda'o ini sato'o yo Jesús.

Mii vá Jesús kúu yuu ndáya'i cháa ka

⁴ Sa'á ñoó kuyati cháa ka ndo noo Jesús, na kúu tát'on iin yuu takí, tá'an ña ni kañó'ó ta ñayuu yó'o. Tído mii Ndios kúu na ni kaxi ñaá, ta kúu ná yuu ndato cháa ka.

⁵ Ta mii ndó kúu ta'ani tát'on yuu takí. Sa'á ñoó konó ndó ná kava'a Ndios ve'e ño'o na xí'in ndó, dá kakuu ta'ani ndó duti i noo mii ná, dá kuu doko ndo ña náta'an ini Ndios xini na, ta kúu natiin va'a na ña dóko ndo sa'á ña ni kee Jesucristo.

⁶ Ch̄i ká'an ta'ani tuti i Ndios di'a:
Ko'in chindu'í iin yuu ió tito ndáya'i cháa ka chí ñoo Sion,
dá ch̄i yuu yó'o kían ni kaxi mií, ta kían iin yuu ndato.

Sa'á ñoó ndi ndaa mii vá ñayuu ná kandisa ñaá, dá kían ni iin kuu ta'ón o káka'an noo ná.

⁷ Ta noo ndo'ó, na kándisa, yuu yó'o kúu yuu ndato cháa ka. Tído ndidaá na ko kándisa ñaá, ndo'o na tát'on k̄i'o ká'an tuti i Ndios:
Tá'an yuu ni kañó'ó ta káva'a ve'e,
ña yó'o di'a va ni kasandaá kakuu yuu tito.

⁸ Ta ká'an ta'anian di'a:
Mii yuu yó'o kedaá xí'in ná, dá kachi'i sá'a ná, ch̄i kían iin yuu kedaá xí'in ná kwei na.
Ni kachi'i sá'a ná ch̄i ko xín na kueídó'o na to'on va'a, ch̄i sa k̄i'o dión ni ni'í tá'í ná ndo'o na.

Kúu yó na ñoo Ndios

⁹ Tído ndo'ó kúu na ni kaxi mii Ndios kakuu ñayuu na, ta kúu ndó duti noo mii Ndios, na kúu rey, ta kúu ndó iin ñoo i, ta kúu ndó ñayuu ni taó

xóo mií Ndios, dá kasto'on ndó sa'á ña ndato kée na, chī noón kúú na nī naditá ndo'ó íchi noo ín naá, ta nī nachī'i na ndo'ó íchi noo ndato tóon.

¹⁰ Chī tá sata kō ní sá kuu ndó iin ñoo, tído viti nī kasandaá ndo kúú ndó ñoo mií Ndios. Tá sata kō ní kándeé ndó ña ku'u ini Ndios sa'a ndo, tído viti kían nī ni'i ndo ña kú'u ini na sa'a ndo.

Kánian na'a yo mií yó ña kúú yó kuendá Ndios

¹¹ Na manī, seí nda'avíi noo ndo'ó, na ndéi tóo ñoo tukú xaan, ña o sa náki'o ndó mií ndó noo ña kini kóni ñi ndo, ña naá tá'an xí'ín ña va'a kóni nío ndo keean.

¹² Di'a koo ini ndo kendúsá'ano ndó noo ñayuu kō ná'á Ndios, dá kían va'ará chínaní kini na ndo'ó viti, tído ná keká'ano na Ndios sa'á ña va'a kée ndó tá ná kasandaá kuu dátoon Ndios ñaxintóni ná.

¹³ Ta sa'á ña ió ñañó'ó yó noo sato'o yo Jesús, sa'á ñoo koo ini ndo kueídó'o ndó ndidaá ta né'e choon ñayuu yó'o, á mií rá kúú rá rey, ra né'e choon ká'ano cháá ka,

¹⁴ o á mií rá kúú rá ta né'e choon ño'o tixi ndá'a rey ñoo, tá'an ra nī ni'i choon ña kadi ra ñayuu kíni ve'e kaa, ta né'e ta'ani ra choon ña náki'o ra ñañó'ó noo na kée ña va'a.

¹⁵ Dá chī ña kóni Ndios kían kee ndó ña va'a, dá ná o ní'i ñayuu xixi kōó ñaxintóni ña ka'an ndava'a na sa'a ndo.

¹⁶ Kō ño'o ndó tixi ndá'a ni iin ley, tído ná dá'a ni ka'an ndó ña nónó noo ndo kee ndó ña kini. Di'a nónó noo ndo kee ndó ña kóni Ndios.

¹⁷ Koo ñañó'ó ndó noo ndidaá ñayuu, ta ku'u ini ndo sa'á na kúú kuendá Jesús, ta kayu'ú ni'ini ndó Ndios, ta koo ñañó'ó ndó noo ta né'e choon.

Nakì'o ndeé iní yò tátò'on kì'o nì xì'o ndeé iní Jesús tein tándó'ó

18 Ta ndo'ó, na ñó'o tixi ndá'a iin sato'o, kueídó'o ndó ra kúú sato'o ndo xí'ín ña'ño'ó. Ta ná dá'a ni kee ndó dión sava'a xí'ín ra kée ña va'a xí'ín ndó. Kì'o dión ta'ani kánian kee ndó xí'ín ra kéndava'a xí'ín ndó.

19 Dá chì iin ña va'a kíán noo Ndios ña sa'á ña ñó'o ini ndo sa'a ná, sa'á ñoó xì'o ndeé iní ndo tá kéndava'a sato'o ndo xí'ín ndó, va'ará ni iin ña kini kò ní kée ndó.

20 Chì, ¿ndí kíán va'a ni'ì ndo tá xì'o ndeé iní ndo tá kéndava'a sato'o ndo xí'ín ndó sa'á ña kée ndó ña kini? Tído tá kéndava'a ra xí'ín ndó sa'á ña kée ndó ña va'a, ta xì'o ndeé iní ndo, dá kíán náta'an ini Ndios xiní na ndo'ó.

21 Chì nì kana Ndios ndo'ó ña kee ndó dión, dá chì kì'o dión ta'ani nì ndo'o naní nío mií Jesucristo sa'a yò, ta kì'o dión nì daná'a na noo yò kaka yó íchì nì xika mií ná.

22 “Ni iin tó'ón kuachi kò ní kée na, ta ni iin ña tó'ón kò ní kána yú'u ná ka'an na.”

23 Ta va'ará nì ka'an ndava'a ra xí'ín Jesús, tído ni iin tó'ón tò'on ndava'a kò ní nándió né'e na ka'an na xí'ín rá. Ta va'ará nì dandó'o ra nío ná, tído ni iin ña'a kò ní ka'an na kee na xí'ín rá. Di'a nì nachi'i na ndidaá ña nì ndo'o na noo ndá'a Ndios, na kényiko ndaa sa'a ndidaá kúú ña'a.

24 Ta nì nakuido mií Jesús ndidaá kúú kuachi yó tá nì sarkaa na ndika cruz, dá ná kandeé yó dánkoo yó kuachi kée yó, dá ná koni yò kee yó ña ndaa noo Ndios. Dá chì sa'á ña nì tarkue'e Jesús, sa'á ñoó nì nduva'a yó, ta nì nduvii yò.

25 Dá chì nì sa kuu ndó tátò'on léko nì sa xionoo

ndava'a. Tído viti n̄i n̄andió kuéi ndó noó n̄a ndáka ñáá, ta ndaá va'a na n̄ío ndo.

3

Di'a kánian kee n̄a n̄i tandá'a

¹ Ta ndo'ó, n̄a ñá'a, koo ini ndo kueídó'o ndó yíi ndo, dá kían, tá k̄o x̄ín r̄a kandísa ra to'on Ndios, kúú x̄ino ini r̄a kandísa raan sa'á ña k̄endúsá'ano ndó, dá kían k̄o kánian ka'an ndo x̄í'ín rá, dá kandísa raan,

² ch̄i koni r̄a ña va'a kée ndó, ta ió ñaño'ó ndó noo rá.

³ Ta o sa ndí'i téi ini ndo ña koo luu ñíi ndo, á kían ña nacho'on lándo din̄i ndo, o á kían ña keluu ndó mií ndó x̄í'ín oro, o á kían ña kandixi ndó dá'on táyí ndáa.

⁴ Va'a kaan ndi'i ini ndo koo vii n̄ío ndo noo Ndios, ña kían koo luu ndó x̄í'ín ña va'a ini ndo, x̄í'ín ña k̄ueé ini ndo, ch̄i ña yó'o kían o kúyatá ta'on, ta ña yó'o kían náta'an nda'o ini Ndios xiní n̄a.

⁵ Ch̄i di'a luu n̄i sa ndaa n̄a ñá'a sa ndei sa na'á, sa k̄andéé ini n̄a Ndios, ta ndino'o ini n̄a n̄i sa seídó'o ná yíi ná.

⁶ Ch̄i k̄i'o dión sa seídó'o naná sá'ano yó Sara yíi ná Abraham, ta sa ká'an n̄a ña Abraham kúú sato'o n̄a. Ta kúú ndó tát'o'on de'e dí'í Sara sa'á ña kée ndó ña va'a, x̄í'ín sa'á ña k̄o x̄í'o ndó mií ndó ña yu'ú ndo.

⁷ Ta dión ni ndo'ó, r̄a t̄aa, kaño'o ini ndo k̄andei ndó x̄í'ín ñadi'í ndo. Ta k̄i'o ndó ñaño'ó noo ná sa'á ña kúú ná iin n̄a vitá, x̄í'ín sa'á ña natiin nduú n̄a x̄í'ín ndó ña man̄i ña k̄andei chí'í ndó x̄í'ín Ndios. Tá kée ndó dión, dá kían ni iin tó'on ña'a o k̄etéin noo ndo noo ká'an ndo x̄í'ín Ndios.

Va'a kaan ná ndo'o níyo sa'á ña kée yó ña va'a o duú sa'á ña kée yó ña kini

⁸ Ta noo ndí'i, ká'ín xí'ín ndó ña iin tó'ón ná kakuu ñaxintóni ndidaá ní ndó, ta ndo'o sa'a sátá'an ndó, ta koni ndo iin rá iin ndó tát'on k'i'o ndó'o ndó xí'ín na ve'e mií ndó, ta ku'u ini sa'a sátá'an ndó, ta nda'í koo ini ndo.

⁹ O sa nándió kuéi ndó nandió né'e ndó ña kini noó na ni kee ña kini xí'ín ndó. Ta o sa ká'an ndava'a ndó xí'ín na ká'an ndava'a xí'ín ndó. Di'a kaka ndo ña maní noo Ndios sa'a ná, dá chi ná'á ndó ña ni kana Ndios ndo'ó ña kían natiin ndó ña maní noo ná.

¹⁰ Dá chi di'a kaá tuti i Ndios:

Ndi ndáa ndo'ó katoó kandeí va'a, ta kandeí dij ñayuu yó'o,

dá kían kánian kandaa ndo yáa ndo, dá ná o yá'a ña ka'an ndava'an,

ta ni yú'u ndo ná o sa ká'an ni iin ña to'ón.

¹¹ Kexoo ndó noó ña kini, ta kee ndó ña va'a.

Ta nandukú ndó ña kandeí va'a ndó xí'ín ñayuu, ta ndiko toon ndóan.

¹² Dá chi ndé'é va'a sato'o yo Ndios na kée ña ndaa, ta ió nduu na seídó'o na ña xíka na noo ná.

Tído ko náta'an ini na xiní na na kée ña kini.

¹³ ¿Ndá yoo kendava'a xí'ín ndó tá ná ndiko ndo ña va'a?

¹⁴ Tído ndiká'an ndi kúu ví ndó tá kéndava'a na xí'ín ndó sa'á ña kée ndó ña va'a. Sa'á ñoó o sa yu'ú ndo tá kée na dión xí'ín ndó, ta o sa kútúú ini ndo.

¹⁵ Di'a naki'o ndó ñaño'ó noo Ndios, na kúu sato'o yo, xí'ín ndino'o ini níyo ndo. Ta daá kuití kandeí nduu ndo k'i'o va'a ndó kuendá xí'an kueé

ió ini ndo, xí'ín ñaño'ó noo ndi ndáa mií ñayuu ndato'ón ndo'ó sa'á tandee ín kómí ndó.

¹⁶ Ta koo ini ndo kakomí ndó iin ñaxintóni vii, dá kían tá ká'an u'u na sa'a ndo'ó, dá kían ná xíka'an noo mií ná sa'á ña chínani kini na ña va'a kée ndó sa'á ña kuú ndó kuendá Cristo.

¹⁷ Chì va'a cháa ka ná ndo'o níyo yo sa'á ña kée yó ña va'a, tá kì'o dión kóni mií Ndios, ta o duú sa'á ña kée yó ña kini.

¹⁸ Dá chì nì ndo'o ta'ani níyo Cristo tá nì xi'i na iin tó'ón ndée sa'á kuachi yó. Iin na ndaa kuú ná, tído nì xi'i na sa'a yóo, na kómí kuachi, dá kuu kandaka na yó ko'on na noo Ndios. Chì miian ndaa nì xi'i yikí koño na, tído ió takí va Espíritu ná.

¹⁹ Ta nì sa'an Espíritu ná nì daná'a na noo espíritu ndadí nì'ini noo ín naá,

²⁰ ta ña yó'o nì sa kuu ña ko ní xín kueíd'o Ndios tá sa na'a, va'ará kueé nì sa ndati Ndios xían nani nì kava'a Noé arca. Ta cháa nda'o ñayuu nì kàki noó takuú kua'a ñoó. Sava'a ona nì sa kuu na.

²¹ Ta viti sódo ndúta yo xí'ín takuú sa'á ña kándée ín yo Jesús, dá kàki yó, táto'on kì'o nì dakáki Ndios Noé noó takuú ñoó. Ko kée yó dión sa'á ña kóni yo nakata yó ñí yo, di'a kée yóan dá chì ndino'o ín yo kóni yo koo vii ñaxintóni yo, chì nì kàki yó sa'á ña nì nàtaki Jesús.

²² Ta nì nana na kua'an nó'o ná induú. Ta viti ió na xoo kuá'a Ndios. Ta tixi ndá'a mí ná ñó'o ndidaá ángel, xí'ín ta né'e choon, xí'ín ta dándáki.

4

Ná dá'a ka ni kee yó ña kini sa kee yó tá ko ñá'a nì nduu yó kuendá Jesús

¹ Tátò'on kị'ò nị ndo'ò níò yikí koño Jesús, kị'ò dión kánian kandeì nduu ndò ndo'ò ta'ani níò ndò, dá chị nà nị ndo'ò níò yikí koño, noón kúú nà nị taó xóo ndó noó kuachi,

² dá kían nani ndéi tóo ndó ndíxi ndó yikí koño ndò, ná dá'a kà ni kandeì ndó kee ndó ñà kini kátóó dao kà ñayuu. Di'a kandeì ndó kee ndó ñà kónị Ndios.

³ Cháá dión kà nị kee ndó tátò'on kị'ò kée ñayuu kò ná'á Ndios, chị sa kátóó ndò kee ndó kuachi xí'ín ndi ndáa mií vā ñayuu, ta sa kátóó ndò kee ndó kuachi ka'an noo xí'ín ñíi ndò, ta sa kuu ndó nà xí'í, ta sa kee ndó víkò ka'an noo, ta sa xí'i lókò ndò, ta sa ndaño'o ndó yoko, ñà kò náta'an ini Ndios xiní nà.

⁴ Ta naá ini nà sa ne'e tá'an vā'a xí'ín ndó sa'á ñà kò kée kà ndò ndidaá ñà kini yó'o, ta ká'an ndavā'a na sa'a ndò viti.

⁵ Tído iin kuú kánian nakị'ò na kuendá noo Ndios sa'á ñà kini kée na, dá chị sa io nduu va Ndios ñà kían keyíkò nà sa'á nà takí, xí'ín sa'á nà nị xí'i.

⁶ Sa'á ñóó nị seídó'o ta'ani nà nị xí'i to'on vā'a sa'a Jesús, dá kían, vā'ará nị xí'i nà tátò'on kánian ndo'ò ndidaá ñayuu, tído takí va níò ná kée Ndios.

Ná kee yó choon nị xí'ò Ndios ñà katị'a yó kee yó

⁷ Sa kua'an kuyati va ñà naá ndidaá ñà'a. Sa'á ñóó ndito koo ini ndò, ta kaño'o ini ndò ka'an ndò xí'ín Ndios.

⁸ Ta ñà ndáyà'i cháá kà kánian kee ndó kían ndino'ò ini ndò ku'ụ ini ndò sa'á ñayuu xí'ín ndó, chị tá kú'ụ ndisa ini yò sa'a dao kà ñayuu, dá kían kị'ò ká'ano ini yò sa'a ná, vā'ará kuá'á ndà'ò kuachi kée na xí'á.

⁹ Ta koo ini ndo natiin va'a ndó ñani ndo tá kosaa na ve'e ndó, ta o sa ká'an kuáchi ndo tá kée ndó dión.

¹⁰ Ta noo iin rá iin ndó ni xi'o Ndios ña katì'a ndó kee ndó iin choon, sa'á ñoó dákuá'ano ndó dao ka ñayuu xí'án. Chi ni ni'i ndo choon ña kechóon va'a ndó noo ndidaá ña manì ni xi'o Ndios noo ndo.

¹¹ Sa'á ñoó tá dána'a iin ndó, dá kían dána'a ndo tát'o'on ki'o ká'an to'on Ndios. Tá xínkuáchi ndó noo ñani ndo, dá kían kechóon ndó xí'ín ndée xí'o mií Ndios noo ndo. Ta sa'á ña kée ndó dión, sa'á ñoó natiin Ndios ndidaá tá'an ñañó'ó sa'a Jesucristo, na daá kuití kómí ndidaá tá'an ñañó'ó, ta daá dándáki na ndidaá ña'a. Dión ná koo.

Ná kadii iníó tá ndó'o níó yo sa'a Jesús

¹² Ñani manì, o sa naá ini ndo sa'á tandó'ó kini ndó'o ndó, tá'an ña xírndodó ndó'ó. O sa ká'an ndó ña ko kánian ndo'o ndó dión.

¹³ Di'a kadii ini ndo sa'á ña ndó'o ndó tát'o'on ni ndo'o Cristo. Chi tá ná kasandaá kuu nandió koo na xí'ín ndidaá ña ndato kómí ná, dá kían nakutí ndó xí'an kadii ini ndo.

¹⁴ Tá ká'an ndava'a ñayuu sa'a ndo sa'á ña kúú ndó kuendá Cristo, dá kían ndiká'án ndi kúu ví ndó, chi ió Espíritu ndato Ndios xí'ín ndó. Mií'an ndaa ká'an ndava'a ñayuu sa'a Espíritu, tído sa'a ndo'ó natiin na ñañó'ó.

¹⁵ Chi iin ña ka'an noo nda'o kían tá ndó'o níó ndo sa'á ña sa'ání ndo ndii, o sa'á ña kí'in kuí'íná ndó, o sa'á ña kúú ndó na kini, o sa'á ña chírnee chítuu kúu ndó noó tandó'ó dao ka na.

¹⁶ Tído tá ndó'o níó ndo sa'á ña kúú ndó kuendá Jesús, dá kían ná dá'a ni xíka'an noo ndo. Di'a keká'ano ndó Ndios sa'á ña ndó'o ndó dión.

17 Dá chì sà nì kasandaá va kuu ñà keyíko Ndios sa'á ñayuu na. Ta tá dinñó'ó keyíko na sa'a yóó, dá kían, ¿xíni ndí kían ndo'o na ko xíin kueídó'o to'on va'a sa'a Jesús tá ná keyíko sa'a ná?

18 Dá chì di'a kaá tuti ii Ndios:
Ndi kì'o ví kánian ndo'o níó na kée ñà kóni Ndios,
dá kàki na.

Sa'á ñóó, ¿xíni ndí kían ndo'o na ko xíin kandísa
Ndios, xí'in na kée kuachi?

19 Sa'á ñóó tá kóni Ndios ñà kían ndo'o níó ndo, dá
kían nakí'o ndó mií ndó noo ndá'a ná, chì iin na
ndaá kúú na nì kava'a ñayuú yó'o. Ta daá koo ini
ndó kee ndó ñà va'a.

5

Di'a kánian kee na sá'ano né'e choon ve'e ño'o

1 Ta kóni kakai iin ñà mani noó na sá'ano né'e
choon noo ndo, chì na sá'ano ta'ani kúú yu'u. Ta
nì xini xí'in noó tátó'on nì ndo'o níó Cristo, ta koo
ta'ani yu'u xí'in ndó noo ndato káa na'a noo Ndios
chí noo.

2 Koo ini ndó kandaka ndó ñayuu Ndios ñó'o tixi
ndá'a ndo, ta kandaa va'a ndó na, tído o sà kée
ndóan sa'á ñà kánian kee ndóan, di'a kee ndóan
xí'in ndino'o ini ndo. Ta o sà kée ndóan sa'á ñà
kátoó ndo dí'on. Di'a kee ndóan sa'á ñà ndino'o ini
ndo kóni ndo chindeé ndó na.

3 Ta o sà kée ndó mí ndó iin sato'o noó na ndáka
ndó. Va'a kaan kee ndó ñà va'a noo ná, dá ná katí'a
ta'ani na kee na dión.

4 Dá tá ná kasandaá kuu nandió ko tuku Jesús,
na kúú mí sato'o noo ndidaá na ndáka léko, dá
natiin ndó iin corona, ñà kúú ñañó'ó, ñà kían nì iin
kuu o naá.

⁵ Ta dión ni ndo'ó, takuáchí tákí, koo ini ndo kueídó'o ndó na sá'ano né'le choon ve'e ño'o ndo. Ta ndidaá ní ndó kánian kueídó'o tá'an ndó xí'an nda'í ió ini ndo, chí:

Ko náta'an ini Ndios xiní na ñayuu ió táyí ini, ta di'a xí'o na ña maní noo ñayuu ió nda'í ini.

⁶ Sa'á ñoó nda'í koo ini ndo kaño'o ndó tixi ndá'a Ndios, dá kían ná k'i'o na ñaño'ó noo ndo tá ná kasandaá kuu ni kaxi mií ná.

⁷ Ta chikodó ndó ndidaá tandí'i ini ndó'o ndó noo ndá'a Ndios, dá chí noón kúú na ndí'i ini sa'a ndo.

Kandaa ndo mií ndó noo ña u'u

⁸ Ta kaon koo ndó, ta kaño'o ini ndo kandeí ndó, chí ña u'u kían xiní u'u ndo'ó. Táto'on k'i'o kée iin ndika'a tondó, k'i'o dión kéean xionooan ndúkúan ndá yoo kendava'a xí'an.

⁹ O sa kónó ndó ña dátúúan ndo'ó. Kuita toon ndó xí'in ña kándéé ini ndo Jesús, dá kandeé ndó xí'an. Chí sa ná'á vá ndó ña k'i'o dión ta'ani ndó'o nío dao ka na kúú kuendá Jesús ndéi iin ní kúú ñayuu.

¹⁰ Tído Ndios, na xí'o ndidaá ña maní noo yo, noón kúú na ni kana yó ña kandeí chí chí yó noo ndato náye'e sa'á ña ni kee Jesucristo. Sa'á ñoó, tá ni ndi'i ni ndo'o nío ndo cháá, dá ndendaá na ndo'ó, ta nachikata ndaa na ndo'ó, ta k'i'o na ndée noo ndo, ta ndendakí ná ndo'ó xí'in ña kándísa ndó.

¹¹ Ta daá kuití ná natiin na ñaño'ó, ta daá ná dándáki na ndidaá ña'a. Dión ná koo.

Yó'o ká'an Pedro ndisá'an noo ndi'i

¹² Ta xí'in ñani yo Silvano, tá'an ra kúú iin ta ná'í iin ndaa xí'in Jesús, ni taai cháá to'on noo tuti yó'o kosaaan, dá ka'an ni'inii noo ndo, ta xí'o ndaa

kuendá ña k̄i'o dión kémani Ndios ndo'ó, ta sa ñó'o ndó t̄ixi ña man̄i yó'o viti.

¹³ Ta na kúu kuendá Jesús ndéi chí Babilonia, tá'an na n̄i kaxi mií Ndios táto'on k̄i'o n̄i kaxi na ndo'ó, xí'ín ñani yo Marcos, na kúu táto'on de'e mií yu'ụ, tánda'á ndisá'án kosaạ noo ndo.

¹⁴ Ta ña ka'an tá'an ndó ndisá'án ná kakuuan ña chitó tá'an ndó noo ndo sa'á ña kú'ụ ini sa'a sátá'an ndó. Ta daá kuití ná koo va'a ini ndo'ó, na kúu kuendá Jesucristo. Dión ná koo.

**Tuti yó'o kúú to'on Ndios, ta xí'o ña kuendá
sa'a Jesús
New Testament in Mixtec, Tezoatlán (MX:mx:Mixtec,
Tezoatlán)**

copyright © 2006 Wycliffe Bible Translators, Inc.

Language: Mixtec, Tezoatlán

Translation by: Wycliffe Bible Translators, Inc.

Mixteco, Tezoatlán [mx], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Tezoatlán

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b81ac6b3-0ad5-5336-8d42-4c2703b04e9f